

Den reunion cu Formador Eman

FTA y SINBA a pidi pa sigui cu e plataforma di consulta di Dialogo Social



ORANJESTAD(AAN): Riba Diaranson formador Mike Eman y su team a sigui den combersacion cu e diferente gremio y institucionnan den comunidad, den cuadro di formacion di un Gobierno nobo.

Den oranan di atardi deliberacionnan cu e prome grupo di sindicatonan, den e caso aki FTA, SIMAR, SINBA, SIWA y STT a inicia. Pa FTA e reunionnan aki ta conoci, ya cu e sindicato a

participa den algo similar den e proceso pa yega na e prome Gabinete Mike Eman.

Diaranson FTA a tende for di formador e deseo di Gobernador di Aruba pa loke ta e maneho di proximo 4 añanan pa Aruba. Como sindicato FTA, segun su Presidente Rudy Geerman, ta haya esaki un bon oportunidad pa duna su opinion pero tambe puntonan cu FTA ta desea pa e Gobierno nobo tene cuenta cu nan. "E tabata un bon reunion

unda nos a haya un splicacion di e ideanan y mi por bisa cu nos ta contento," Geerman a comenta.

El a bisa tambe cu FTA den dos siman lo tin un Congreso Extraordinario unda lo discuti tur e aspectonan cu a worde treci dilanti den e reunion cu formador y basa riba esaki ta traha un documento cu e puntonan cu e proximo gobernacion mester tene cuenta cu nan. FTA ta un di e gremionan cu semper

a participa den reunionnan di Dialogo Social, dunando semper un aporte. "Dialogo Social tabata un di nos prome puntonan. FTA semper tabata na fabor pa bini cu un Dialogo Social. Ta un hecho cu Dialogo Social a hiba paisnan grandi den e desaroyo cu nan tin awor, anto nos ta bisa cu Dialogo Social mester keda." E mesun atardi aki tambe formador a reuni cu e Sindicato di Bomberonan di Aruba (SINBA), cual a worde representa pa Emilio Kock, kende tabatin comentario positivo pa e encuentro,

unda e sindicato a haya informacion di Formador di kico a worde propone pa e proximo gobernacion. Kock a menciona cu e instrumento di Dialogo Social tambe a worde menciona como un forma di consulta cu lo mester sigui den e siguiente gobernacion. Dialogo Social, pa SINBA, ta un forma importante pa intercambia di idea riba temanan cu ta riguarda Aruba. E sindicato mes ta contento cu e atencion cu nan a bin ta ricibiendo for di Gobierno pa Departamento di Bombero.